


Fasnacht 2009



FASNACHTSCLIQUE
JUNTERESSLI

Jungi Garde + Binggis

Sujet:


Mir hoole s'BuLa an d'Fasnacht- well Pfadi uns Gschpass macht

Zält an Zält und Fahne an Fahne
Blachebahne an Blachebahne
S'Duech ume Hals und d'Uniform umd' Bruscht
D'Wanderschueh bunde, spürsch d'Lagerluscht?
Letschde Summer het sy toobt,
wells BuLa ufem Brogramm stoht.
Zwanzigdausig grossi und glaini
Wölfli und Pfadi hänn fröhlig, so maini
und unüberhörbar d'Linthebeni bsetzt
und sinn zwai ganzi Wuche im Zyg umme gwezt



Dä Pfadi deert linggs ganz hinde
sett dringend emool im Wald verschwinde.
Drei mool ume Baum, zwei mool ume Struuch-
Jä so wills dr wältwytt Pfadibruuch,
dass me's Hyysli guet im Wald versteggt
as jo nid jede no alles schmeggt.

Dr Thomi wird dauft, „Thomi“ längt nimm uss
e aige Pfadinamme- do kunnt kaine druss.
Dr Namme sött basse und zaige wär är eso isch,
drum haisst är jitz dangg de riise Auge halt nur no „Fisch“



Sone Dauffi isch grausam und schwär z'iberläbe,
wirdsch gschluucht und driibe- s'isch scho bitz drnäabe
Zerscht robsch dure Schlamm und gheisch ufe Buuch
denn segglisch dure Wald, wirsch paggt wie ne Schluuch
iber Stogg und Stai, ufe Baum und aabe gumppe
singe muesch au no, d'Laiter lehn sich nid lumppe
Und denn am Fүүr gits dr Zauberdrangg z'dringge
Drinn isch alles, wo in dr Kuchi duet stingge
E halbe Schbägg- Sänf, Pfäffer, Zuger und Salz
d'Spaghetti vom Samschdig, au Angge und Malz
drei Leffel Honig und oobedruuff no bitz Nyydle
das isch e Qual, wär mag so ebbis verlyyde!
Fir dr Pfadinamme will me's doch alle richtig zaige
wennd' Dauffi iberstosch, duet sich e Mänge vernaige!

Dr Filou (mit Pfadinamme) dä zimmlig fräch Goof
sett Pfanne schrubbe, Däller wäsche - das findet är doof
Doch die Ämtli, die gheere ins Lagerbrogramm yyne
Do hilft kai dummi Schnuure, au kai druurig' Myyne.
Denn alles sett sauber syy und ordentlich verstaut,
nid dass s'Lagerbild am Schluss no dr Ruef versaut.

S'Nachtspiil im Mondschyyn, das isch denn e Sach
Dr Laiter „Mops“ brüllt alli Pfadi wach
Jetzt stehn alli zämme, friere, sinn mied
s'waiss kaine was kunnt, do gheert me bletzig e Lied
e Gaischt bewegt sich zwische ´me Baum und `me Busch
Uffs mool sinn alli wach, rugge zämme und - husch
schwärme sy uss und jage dä Gaischt zmitzt duur d' Böim
stolpere, falle, hetze - wie in de wildeschde Dröim!
Denn hänn en- ändlig- und fessle-n-en fescht und guet
Vo Angscht kai Spur, in de Auge blitzt Muet
Und zrugg im Zält isch jede Pfadi überzügt
das me ihn mit em Gäischderjägerbryys beglügt



Zwische zwai Zält, wo windschief im Wind steehn,
singt dr Koch mit Namme „Pizza“ windschiefi Deehn
Ghaggt mit Heernli wird hit ufem Lagerblatz gässe,
fir alli Pfadis s'Glyyche, hey isch das e Frässe!
S'Wasser kocht und Salz hets scho dinne
am Rand schwimmt au no e dooti Spinne
das isch glyych- e Pfadi steerts z'Letscht
schnäll d'Heernli dry und wydder im Tekscht
Brootpfanne ufs Fiir, finf Ziibelegge,
s'Haggfleich drzue - s'Brot derzue bagge!
libere seggle zem Oofekonstruggt,
ruedere, ussrutsche und aabebuggt,
s'Brot flott in Oofe, zrugg speede in d'Kuchi,
deert wartet dr Salat - He nai: „e Sosse bruch-y!“
Nimm schnäll dr Pfäffer, Öl, Salz, Sänf und Essig
hit ischs fir dr „Pizza“ grausam stressig!

Will uns das BuLa gfalle het und mir's au schetze,
lehn mir die Pfadi an dr Fasnacht ummewetze
Mir zaige's BuLa-Pfadiläbe uff dr Strooss,
S'BuLa '09 an dr Fasnacht- unsri Fraid isch gross
Mir sinn laggert - das kasch denn grad vergässe!
Bi dämm viile Drägg wär laggert sy vermässe!
Doch dä Fasnachtsdrägg uff de Stroosse s'isch wöhr
längt bi de BuLas logger fir hundert Jahr!

D Ladäärne-Uusstellig uff em Minschterplatz und d Waage- und
Reggwisye-Uusstellig bi dr Kasäärne sin vom Määntig znacht bis am
Mittwuch demoorge!

Deert und an de 3 Verkaufsständ (CINS) in dr Stadt ka men au alli
Zeedel und Schnitzelbängg, d Blaggede und dr Rädäbäng kaufe.

Die 1. Leggtion findet am Fritig, 6. März vom 13.00 bis 17.00 und am
Samschdig, 7. März vom 11.00 bis 17.00, wie aalewyyl ufem Barfi statt.
Infos unter: www.fasnachts-comite.ch

Drugg: Runser Druck & Satz AG, Basel